

**Dumonda Müller (Susch) concernent la finanziaziun dal parc naziunal svizzer**

Il parc naziunal svizzer (PNS) presta oz bler dapli che quai che vegn pretendì tenor lescha. La valorisaziun ch'il PNS generescha en il chantun ed en spezial en la regiun Engiadina/Val Müstair è vegnida stimada l'onn 2013 da l'università da Turitg a ca. 20 milliuns francs. Mintga onn visitan var 150 000 persunas il territori protegì. Las exposiziuns en il center da visita a Zernez ch'è avert durant tut l'onn èn vegnidas visitadas da tut en tut 300 000 giasts ils onns passads. La preschientscha en las medias procura al chantun ina gronda atenziun en vasts circuls da la populaziun da la Svizra e da l'exteriur. Cun quai presta il PNS ina contribuziun essenziala en il marketing da las destinaziuns turisticas. Resumond poi vegnir constatà ch'il PNS è ina instituziun relevanta per il sistem da l'economia chantunala.

Sco unic parc naziunala da la Svizra dastgass sia attracziun anc surpassar quella dals parcs natirals regiunals en il chantun. Quests ultims vegnan sustegnids dal chantun cun meds finanzials considerabels.

Per il project dal parc naziunal Adula che ha fatg naufragi a las votaziuns dal pievel èn stads previs meds finanzials da gestiun dad annualmain passa 5,2 milliuns francs. Ils chantuns Grischun e Tessin avessan sa participads cun mintgamai 10 %, pia cun var 500 000 francs als custs da gestiun.

Ils resultats annuals dal PNS èn stads negativs ils ultims onns. Ina pausa speziala han las investiziuns necessarias resp. lur amortisaziuns per la tgira da las visitadras e dals visitaders (center dal parc naziunal, mantegniment da las sendas, infurmaziun da las visitadras e dals visitaders) sco er las pretensiuns creschidas en il sector da la communicaziun (medias digitalas, social media). Incumbensas, che la lescha na prescriba betg da princip. Sch'i na vegnan betg avertas pussaivladads supplementaras da finanziaziun è il PNS sfurzà en il proxim futur da realisar mesiras da spargn en ils secturs menziunads qua survast, q.v.d. da sa restrenscher a las incumbensas da basa prescrittas da la lescha. Quai avess per consequenza che las prestaziuns, en spezial la qualitat da l'infrastructura e da la paletta da purschidas per ils giasts, vegnissan reducidas marcantamain.

En vista a la situaziun preschentada qua survast ed en vista a la relevanza economica incontestada dal PNS per tut il chantun fissi giustifitgà tenor l'avis da las sutsegnadras e dals sutsegnaders e da gronda valor sociala, sch'il chantun sa participass finzialmain a lunga vista en moda adequata als custs per incumbensas dal PNS.

En quest connex tschentan las sutsegnadras ed ils sutsegnaders las suandantas dumondas a la regenza:

1. È la regenza er da l'avis ch'il parc naziunal svizzer è ina instituziun relevanta per il sistem da l'economia chantunala?
2. È la regenza pronta da sustegnair il manaschi dal parc naziunal svizzer en la medema dimensiun sco che quai fiss stà previs per auters projects da parcs?
3. Vesa la regenza ina pussaivladad – sin basa da las prestaziuns dal parc naziunal svizzer a favur dal chantun numnadas qua survast – da prestar – en il rom d'ina incarica da prestaziun generala – ina contribuziun annuala als custs da gestiun dal parc naziunal svizzer?
4. Vesa la regenza ina pussaivladad da conceder contribuziuns à fonds perdu al parc naziunal svizzer per investiziuns a favur dals giasts – p.ex. per il mantegniment da las sendas marcadadas u per installaziuns per las visitadras ed ils visitaders?
5. Vesa la regenza ina pussaivladad da sustegnair il parc naziunal svizzer – en il rom d'ina incarica da prestaziun – da manar in center da visitadras e visitaders e da furmaziun a Zernez?

Puntraschigna, ils 12 da zercladur 2019

**Müller (Susch)**, Pfäffli, Preisig, Aebli, Atanes, Berther, Berweger, Bettinaglio, Brandenburger, Buchli-Mannhart, Cahenzli-Philipp, Casty, Caviezel (Cuira), Caviezel (Tavau Clavadel), Censi, Clalüna, Danuser, Della Cà, Derungs, Ellemunter, Engler, Felix, Gasser, Geisseler, Grass, Gugelmann, Hardegger, Hartmann-Conrad, Hitz-Rusch, Hofmann, Hohl, Horrer, Jochum, Kienz, Kunfermann, Lamprecht, Locher Benguerel, Maissen, Michael (Donat), Natter, Niggli (Samedan), Niggli-Mathis (Grüsch), Noi-Togni, Rettich, Ruckstuhl, Rüegg, Rutishauser, Salis, Schwärzel, Tanner, Thomann-Frank, Thöny, Thür-Suter, Tomaschett (Breil), von Ballmoos, Weidmann, Widmer (Favugn), Widmer-Spreiter (Cuira), Wieland, Zanetti (Sent), Pajic